

TXOMIN PEILLENEN AGOSTI-XAHO SARIA JASO

2008ko urtarrilaren 10ean, Txomin Peillen euskaltzain emerituak Agosti Xaho saria jaso zuen. Saria Agosti Xaho Kultur Elkartearen Elixabete Piñol presidentearen eskutik jaso zuen, Baionako Fakultatean egin zen ekitaldian. Elixabete Piñolek azaldu bezala, bizitza guztian egindako lanagatik eman diote saria.

Elixabete Piñolen esanetan, ugariak dira Txomin Peillenen merezimen-
duak: «Euskaltzain osoa, Unibertsitateko katedratiko emeritua, ikertzaile
nekagaitza hizkuntzalaritza arloan, langile sutsua hamaika erakundetan, elebe-
rri, olerki eta antzerki idazlea».

Peillenek sortutako literatura lan batzuen izenburuak gogora ekarri zituen,
bai eta eskuratu dituen sari batzuk ere. «Egindako lan guztiagatik –gaineratu
zuen– merezi du Txominek Agosti Xaho saria. Gizon handia, estimatua, mai-
tagarria eta euskaltzale sutsua. Eta guk beste meritu bat gehituko dugu: bere
umorea».

Elixabete Piñolekin batera, Mikel Coia elkarteko idazkaria ere izan zen
Baionan.

Agosti Xaho Kultur Elkartearen xedea euskara eta euskal kultura susta-
tzea da. Ipar Euskal Herriko errealitateari begirune bereziaz erreparatze aldera,
Lapurdikoa, Nafarroa Behereko eta Zuberoako idazleek eta euskaltzaleek egiten
duten lana zabaldu nahi du, bai eta mugaz bi aldeen arteko loturak sendotu
ere, beti ere kultura eta euskararen bitartez. Urtero, beste ekitaldi batzuen
artean, Agosti Xaho saria banatzen du, Zuberoako Zohardia Kultur elkarte-
rekin batera.

Aurreko urteotan, hauek jaso dute Agosti Xaho saria: Battitta Urruty
zenak, Jean Mixel Bedaxagarrek, Junes Casenavek, Daniel Landartek eta Jean-
-Louis Davantek.